

სსიპ საქართველოს შოთა რუსთაველის თეატრისა და კინოს სახელმწიფო უნივერსიტეტის ადმინისტრაციულ შენობებში წესრიგის დაცვის შესახებ დისციპლინური პასუხისმგებლობის ნორმები

§1. რეგულირების სფერო

(1) სსიპ საქართველოს შოთა რუსთაველის თეატრისა და კინოს სახელმწიფო უნივერსიტეტის ადმინისტრაციულ შენობებში წესრიგის დაცვის შესახებ დისციპლინური პასუხისმგებლობის ნორმები (შემდეგში: დისციპლინური პასუხისმგებლობის ნორმები) აწესრიგებს უნივერსიტეტის ადმინისტრაციულ შენობებში წესრიგის დაცვას.

(2) დისციპლინური პასუხისმგებლობის ნორმები ვრცელდება როგორც უნივერსიტეტის აკადემიურ, ადმინისტრაციულ და დამხმარე პერსონალზე, სტუდენტებზე და სხვა ნებისმიერ პირზე, ვინც იმყოფება უნივერსიტეტის ადმინისტრაციულ შენობაში, მიუხედავად დაკავებული თანამდებობისა თუ სოციალური სტატუსისა.

(3) დისციპლინური პასუხისმგებლობის ნორმების დარღვევა იწვევს დამრღვევის მატერიალურ პასუხისმგებლობას.

§2. მიზანი

დისციპლინური პასუხისმგებლობის ნორმების მიზანია:

1. უნივერსიტეტის ადმინისტრაციულ შენობებში წესრიგის დაცვა;
2. უსაფრთხო გარემოს უზრუნველყოფა;
3. ადამიანის ჯანმრთელობის დაცვა და პატივისცემა.

§3. პასუხისმგებლობის გამოყენება

დისციპლინური პასუხისმგებლობის ნორმები გამოიყენება დამრღვევის მიმართ, მიუხედავად დარღვევის სამუშაო სთ-ებში თუ მის შემდეგ ჩადენისა.

§4. დისციპლინური პასუხისმგებლობის დაწესება

(1) დისციპლინური პასუხისმგებლობა წესდება უნივერსიტეტის ადმინისტრაციულ შენობებში თამბქოს მოწვევის, ალკოჰოლური ნივთიერების მიღების ან/და მათი ზემოქმედების ქვეშ ყოფნაზე და შენობის დანაგვიანებაზე.

(2) თამბქოს მოწვევის, ალკოჰოლური ნივთიერების მიღების ან/და მათი ზემოქმედების ქვეშ ყოფნისა და შენობის დანაგვიანებაზე დაწესებულია ფულადი ჯარიმა.

(3) ფსიქოტროპული, ნარკოტიკული ან სხვა ძლიერმოქმედი ნივთიერების მიღების ან/და მათი ზემოქმედების ქვეშ ყოფნისას, დამრღვევი გადაეცემა სამართალდამცავ ორგანოებს.

§5. თამბაქოს მოწვევის წესების დარღვევა

(1) უნივერსიტეტის ადმინისტრაციულ შენობებში თამბქოს მოწვევა დაშვებულია ამისათვის საგანგებოდ გამოყოფილ ადგილებზე, სადაც მითითებულია: „მოწვევა ნებადართულია“ ან „მოსაწვევი ადგილი“. მსგავსი წარწერის არარსებობისას, მიიჩნევა რომ მოწვევა აკრძალულია.

(2) თამბაქოს მოსაწვევად ნებადართულ ადგილებს ადგენს უნივერსიტეტის ადმინისტრაციის ხელმძღვანელი ბრძანებით.

(3) დაუშვებელია თამბაქოს მოწვევა სასწავლო აუდიტორიაში, გარდა იმ შემთხვევისა, თუ თამბაქოს მოწვევა ხდება კინოგადაღების ან შესაბამისი სცენარის შემადგენელი ნაწილი, რაზეც შესაბამისი ფაკულტეტის დეკანის მიერ 3 სამუშაო დღით ადრე წერილობით უნდა გაფრთხილდეს დაცვის სამსახური.

(4) თამბაქოს მოწვევა დაშვებულია უნივერსიტეტის თანამშრომლის სამუშაო კაბინეტში შესაბამისი პირის (ვისაც ეკუთვნის სამუშაო კაბინეტი) ნებართვით, თუ თამბაქოს მოწვევას არ ეწინააღმდეგება სამუშაო კაბინეტში მყოფი სხვა პირი. წინააღმდეგობის არსებობისას, თამბაქოს მოწვევის მსურველი ვალდებულია მოსაწევად გავიდეს თამბაქოს მოსაწევად გამოყოფილ ადგილზე.

(5) უნივერსიტეტის ადმინისტრაციულ შენობაში თამბაქოს მოწვევის წესების დარღვევა, იწვევს დამრღვევის დაჯარიმებას 5 ლარის ოდენობით.

(6) უნივერსიტეტის ადმინისტრაციულ შენობაში თამბაქოს მოწვევის წესების დარღვევა განმეორებით, იწვევს დამრღვევის დაჯარიმებას 50 ლარის ოდენობით.

§6. ალკოჰოლური ნივთიერების მიღება ან/და მათი ზემოქმედების ქვეშ ყოფნა

(1) უნივერსიტეტის ადმინისტრაციულ შენობაში აკრძალულია ალკოჰოლური ნივთიერების მიღება ან/და მათი ზემოქმედების ქვეშ ყოფნა, გარდა იმ შემთხვევისა, როცა ალკოჰოლოს მიღება ხდება უნივერსიტეტის ადმინისტრაციის მიერ ორგანიზებულ წვეულებაზე.

(2) უნივერსიტეტის ადმინისტრაციულ შენობაში ალკოჰოლური ნივთიერების მიღება ან/და მათი ზემოქმედების ქვეშ ყოფნა, იწვევს დამრღვევის დაჯარიმებას 50 ლარის ოდენობით.

(3) უნივერსიტეტის ადმინისტრაციულ შენობაში ალკოჰოლური ნივთიერების მიღება ან/და მათი ზემოქმედების ქვეშ ყოფნა განმეორებით, იწვევს დამრღვევის დაჯარიმებას 100 ლარის ოდენობით.

§7. უნივერსიტეტის ადმინისტრაციული შენობის დანაგვიანება

(1) უნივერსიტეტის ადმინისტრაციულ შენობის დანაგვიანებად მიიჩნევა ნაგვის დაყრა სპეციალური სანაგვე ყუთის გარეთ ან რაიმე ნივთიერების ზემოქმედებით საგანზე წარწერის ან/და სხვა სახის მონიშვნის გაკეთება.

(2) უნივერსიტეტის ადმინისტრაციული შენობის დანაგვიანება, იწვევს დამრღვევის დაჯარიმებას 50 ლარის ოდენობით და დამრღვევს დაეკისრება მიყენებული ზიანის ანაზღაურება.

(3) უნივერსიტეტის ადმინისტრაციული შენობის დანაგვიანება განმეორებით, იწვევს დამრღვევის დაჯარიმებას 100 ლარის ოდენობით და დამრღვევს დაეკისრება მიყენებული ზიანის ანაზღაურება.

§ 8. დამრღვევის გამოვლენა

(1) დისციპლინური პასუხისმგებლობის ნორმების დამრღვევი პირის გამოვლენა მიეკუთვნება უნივერსიტეტის დაცვის სამსახურის კომპეტენციას.

(2) უნივერსიტეტის დაცვის სამსახური გამოვლენილ დარღვევაზე, დამრღვევისა და შესაბამისი აკრძალული ქმედების ჩადენის დასახელებით, წერილობით ინფორმაციას წარუდგენს უნივერსიტეტის ადმინისტრაციის ხელმძღვანელს.

(3) უნივერსიტეტის ადმინისტრაციის ხელმძღვანელი გადაცემული ინფორმაციის საფუძველზე გამოცემს ბრძანებას დამრღვევზე ფულადი ჯარიმის დაკისრების შესახებ.

§ 9. ჯარიმის გადახდის ვადა და წესი

დამრღვევი ვალდებულია გადაიხადოს დაკისრებული ჯარიმა უნივერსიტეტის ანგარიშზე ფულის შეტანით, ფულადი ჯარიმის დაკისრების შესახებ ბრძანების გაცნობიდან 10 კალენდარული დღის ვადაში. ამ ვადაში ჯარიმის ნებაყოფლობით გადაუხდელობა იწვევს შესაბამისი ღონისძიების გატარებას: ხელფასიდან თანხის დაკავება, სტუდენტის არდაშვება სასწავლო პროცესზე, ხოლო სხვა პირის შემთხვევაში – სასამართლო წესით თანხის გადახდევინება.

§ 10. გასაჩივრების უფლება

დამრღვევს უფლება აქვს უნივერსიტეტის გადაწყვეტილება ფულადი ჯარიმის დაკისრებაზე გაასაჩივროს სასამართლოში.

§ 11. ძალაში შევლა

დისციპლინური პასუხისმგებლობის ნორმები ძალაშია დამტკიცებისთანავე.